

CIMELIA

Qu

4523



Rhe

VI.



*Rhetorica ecclesiastica*

VI. b. 368

*Teol. 4899*

*Locolovii Stanislaus Partitiones ecclesia-  
sticae?*

*Cracoviae ex off. Lazari. 1589.*

Biblioteka Jagiellońska.



*VI. b. 368.*





4523

CIMELIA

~~VII. 44a~~

Z VII. 67a



12. VII. 672

STANISLAI SOCOLOVII,  
STEPHANI I. quondam REGIS  
Poloniæ Theologi,

PARTITIONES  
ECCLESIASTICAE.

*Ad Petrum Costkam, Episcopum Culmen.*  
*virum Amplissimum.*



CRACOVIAE,  
Ex Officina Lazari: Anno Domini  
M. D. Lxxxix.



Dixisti benè, scripsisti benè : nec fatis, & nos  
Dicere, scribere, dum deficis, ipse doces.  
Hæc tui erant morbi solatia, peste furente :  
O pudeat sanos, otia pigra sequi.

M. And: Schoneus.

*Cim. Qu. 4523*





# PETRO COSTCAE

EPISCOPO CVLMENSI,

viro Amplissimo.

**S**æpenumerò, pro eo, quem aliqui mihi quando-  
que tribuebant, concionandi usu, quæri ex me  
solitum est; quid de hac tota siue vi, & facultate, siue  
modo & ratione sentirem: ita necesse habui, ne aut  
inuidus, aut contumeliosus viderer, toties eadem  
multis dicere & respondere. quod in hoc meo morbo  
mihi magna cum difficultate & molestia euenire so-  
let. Eam ob causam semel eo labore me liberan-  
dum esse: atque quid de hac re iudicarem, aliquid  
literis commendandum, putavi. Non quòd eius rei  
aliquam artem tradere vellem, quæ diuinitus potiùs  
confertur; quàm aliqua humana arte, præceptisq;  
constat: neque vt alios doceam, quæ ipse non planè  
didici; sed vt me hac ipsa molestia, eadem sæpiùs re-  
petendi, libenterem. Te autem potissimum Rme  
Antistes, in hac causa iudicem appello: tibiq; hæc no-  
stra addico: quòd te aliquando de eo toto negotio &  
argumento, dum Torunij in illa prima Reip. quasi  
conglutinatione essemus, disertissimè ac perdoctè, pro  
tuis singularibus ingenij ac eloquentiæ opibus, disse-  
rentem audiuerim: & quòd hæc tua doctrina, libe-

A ij

ralitas,



P R A E F A T I O.

4

*mlitas, virtus denique ipsa digna sit; ut omnium bonorum literæ atque conatus ad te confluant: deniq; ut illa tua, quæ texis atque retexis, premisq; sapiens, plusquàm nonum in annum, quæ iam omnes boni expectant; & quibus iam satis matura esse videntur, à te aliquando hoc genere scriptorum eliciam.*

*Vale, nosq; ut soles, etiam atque etiam vehementiùs ames.*

MIRARIS LIBRI TITVLVM? NON HIC,  
BONE, NVMMOS  
TEMPLI PARTIMVR, SACRA SED  
ELOQVIA.

S. F.



# Partitiones ecclesiasticæ.

ANDREAS, & SOCOLOVIVS.

**A**NDREAS. Ordire igitur id totum, de quo institui volo, à Fine: qui vt est vltimus in actione, ita instituto primum esse debere, in scholis didici. SOCOLOVIVS. Finis, vt scis, duplex est; summus seu vltimus, & interiectus seu destinatus. Et in hac quidem causa, finis primus & vltimus, est honor Dei, & salus proximi. Interiectus autem, errores & vitia euellere, bonos autem sensus & virtutes inferere, iuxta illud: Ecce dedi verba mea in ore tuo: ecce constitui te hodie super gentes, & super regna; vt euellas, & destruas, & disperdas, & dissipes, & ædifices, & plantes. A. Officia ad eum finem conducentia; quæ? S. Docere præcipuè ac permouere. Nam delectare accessorium & humanum est: satîsq; in vera philosophia delectat, qui docet & mouet. A. Obiectum totius facultatis, in quo ea versatur, quod statuis; quæuè eius propria affectio? S. Scholam oles, Andrea; nec malè tamen. Obiectum quidem est, voluntas Dei, quam dicit esse Paulus sanctificationem nostram. Propria autem affectio est, veritas. Sic enim inquit primus Doctor: Ierem. I.

A iij                      ctor: I. Thes. 4



- Ioan.* 18. *Et*or: Ego in hoc natus sum, & ad hoc veni in mundum, vt testimonium perhibeam veritati. A. Quibus præfidiis & instrumentis, huic ipsi nostro Prædicatori, vt hoc efficiat, opus est? S. Vocati-  
one diuina, & superno dono ac lumine imprimis,  
*Ierc.* 23. ne de illo dicatur: Non misi eos, & non præcepi eis, neque locutus sum ad eos, & ipsi currebant. Deinde pietate, ac zelo pro domo Domini; vt il-  
*Psal.* 18. lud dicere possit: Iniquos odio habui, & legem tuam dilexi. Vitæ item integritate, ne illud audi-  
*Psal.* 49. at: Quare tu enarras iustitias meas, & assumis te-  
stamentum meum per os tuum? tu verò odisti di-  
sciplinam; videbas furem, & currebas cum eo, & cum adulteris portionem tuam ponebas. Doctri-  
*osee* 4. na competenti, ne illi dicatur: Quia tu scientiam repulisti, repellam te, ne Sacerdotio fungaris mihi. Diligentia & assiduitate, vt in lege Domini meditetur die ac nocte: nam cui semper dicen-  
dum est, semper item longa meditatione, & co-  
gitatione, lectioneque frequenti mens & oratio  
ditanda & irriganda est; ne opus Domini faciat  
negligenter. Voce & memoria, animoq. præsentis,  
*Exod.* 4. vnde illa Moysis deprecatio: Obsecro Dñe, nō sum eloquens, ab heri & nudiustertius, & ex quo lo-  
cutus es ad seruum tuum, impeditioris & tardi-  
oris



oris linguæ sum. Et Ieremiæ: Ah ah ah, Domine *Iere. 1.*  
 Deus, ecce nescio loqui, quia puer ego sum. Po-  
 test tamen hæc Dominus Deus aliis donis abun-  
 dè compensare. Et quod caput rei est, vt sibi pri-  
 mò persuadeat, quod aliis persuadere vult. Nam  
 & in legato hoc maximè requiritur; vt sit eiusdem  
 sententiæ, cum eo, qui illum mittit; idemque no-  
 lit & velit, quod agit, & cuius causa mittitur.  
 A. A quibus autem dicendi & differendi modis  
 hæc facultas distingui debet? S. A causa ciuili  
 primùm: deinde quæstione, quam disputatam  
 vocant: pòst Scena & Tragœdia: à sermone item  
 aulico: demùm à Satyra & inuectiua, vt mode-  
 stia nostra nota sit omnibus hominibus. A. Ad  
 quorum imitationem se componet Concionator?  
 S. Christi inprimis, Pauli, Prophetarum, Apo-  
 stolorum, Sanctorum Patrum, inter quos patres,  
 Chrysostomus hac in parte omnium iudicio ex-  
 cellit. A. Qua verò id faciet mercede? S. Ea  
 nimirum, quæ est apud Danielem: Qui docti fu- *Dani. 12.*  
 erint, fulgebunt quasi splendor firmamenti: &  
 qui ad iustitiam erudiunt multos, quasi stellæ in  
 perpetuas æternitates. Et illa Christi Domini: *Math. 5*  
 Qui autem fecerit & docuerit, hic magnus voca-  
 bitur in regno cælorum. A. Quid igitur in to-  
 ta sua



ta sua facultate videbit? S. Illa tria communia, quid dicat, quo quidque loco, & quomodo dicat. A. Quid igitur dicet? S. Huc spectat materia & motus. Materiam habebit; si aut scripturam aut locum communem tractauerit. Scriptura variis modis materiam præstabit: nam aliquando tota, quæ tum ab Ecclesia ad populum recitatur, explicari potest: aliquando pars illius. Si tota, id multipliciter: aut historicè, continua rerum & verborum serie eam explanando, quod D. Gregorius, Beda, & alij faciunt: aut expositione prætermissa, exempla & doctrinas simpliciter, vel ad hæreses confutandas, vel ad vitam instituentiam, per communes sententias ex ea eliciendo; quod Basilius in suis moralibus libris, quos Asce-tica appellauit; D. item Thomas in suis sermonibus, & hoc tempore multi, iiq̃ue ex magnis facere solent, præclarè faciunt: aut partitione facta, quod nunc in frequentiori vsu est, per capita tota res explicanda est: vel propositis etiam certis ejus, ad quos præcipuè refertur, finibus, in illis totam orationem consumet, quod nostros quondã in Italia præceptores fecisse memini. Hoc autem in parabolis magnam lucem & commendationē habet. Vel explicata ex Euangelio primaria aliqua



qua difficultate, in prima parte: reliqua breuiter & cursim attinget, vt nunc in Italia cōmuniter fit. Si pars autē explicanda fuerit, habet ea res venustatem singularem; & fit à Basilio, Chrysostomo, & ab aliis; sed acumine opus est, & copia dilata-tioneque materiæ. Quod ita consequetur, si in singulis incisis insistet, vt singula membra sint instituti argumenta, præsertim si loco communi accommodentur. Dabunt præter ea, quæ diximus, occasionem dicendi, cantus, & ritus ecclesiastici eiusdē temporis, introitus, offertoria, hymni, & id genus alia, quæ aliquando firma basis concionis esse possunt. Vniuersa autē hæc ad illos quatuor communissimos, olimque ab Ecclesia receptos, à Paulo inchoatos, & à sanctis patribus usurpatos modos, Anagogē, Allegoriā, Tropologiā, & literalem sensum, prout res & locus postulārit, cautè prudenterque referētur. Solebat enim Origenes iam suis temporibus, scripturam mundo comparare: utque is constet quatuor elementis, ita scripturam quatuor sensibus constare dicebat, literali videlicet, seu historico, quem fundamentū cæterorum appellat: morali, sub quo comprehendit allegoricum, & tropologicum: physico, qui passim non numeratur: theologico, qui idem

B

atque



atque anagogicus est. Quod facilius ex ipsius verbis, si fortè eorum benè memini, intelliges. Diuina, inquit scriptura, mundus quidam est intelligibilis, suis quatuor partibus, veluti quatuor elementis, constitutus: cuius terra est, veluti in medio, imòque instar centri, historia: circa quam aquarū similitudine abyssus circumfunditur moralis intelligentiæ, quæ à Græcis Ethica solet appellari: circa quas, historiam dico, & Ethicam, veluti duas præfati mundi inferiores partes, aër ille naturalis scientiæ circumuoluitur: quam naturalem dico scientiam, Græci vocant Physicam. extra autē omnia & ultra, æthereus ille igneus ardor Empirei cæli, hoc est supernæ contēplationis diuinæ nature, quam Græci Theologiā nomināt, circūglobatur, ultra quā nullus ingreditur intellectus. Hæc ille. Sed & locus cōmunis potest causā dare differendi, qui aut simpliciter tractandus, aut coniunctè. Simpliciter quidem, partim Orationum more, rem perpetua oratione, nudè, & absolutè explicando: partim philosophorum via & ratione, hypothesibus, & fundamentis iactis; & præmissis. Coniunctè autem, vel locum communem cum Euangelio coniungendo; vt si quis incertitudinem vocationis & gratiæ singulorum, qua



qua se hæretici efferunt, probare velit, parabolā  
de eo, qui vestem nuptialem non habuit, vsurpet: *Matt. 22*  
vel contrā Euangelium cum loco communi; vt,  
si quis Euangelium de faucio eunte Ierosolymā *Lucæ 10*  
explicet: accomodet & illustret illud loco com-  
muni de iustificatione. Locus autem communis  
sumi poterit: modò ex re ipsa; quomodo Basilius  
de ebrietate, de ieiunio: modò ex persona; quo-  
modo Ambrosius de S. Laurentio: nunc ex tem-  
pore; quomodo Nazianzenus de Paschate, Na-  
tiuitate: nunc ex loco; quomodo Christus Do-  
minus de ædificatione templi, grauissimam insti-  
tuit orationem: modò ex occasione; quomodo  
Paulus Athenis, ab ara, in qua erat scriptū, igno-  
to Deo, occasione sumpta, magnificè de vero,  
qui fecit cælum & terram, Deo, concionatus est,  
Basilius tempore famis, Cyprianus de mortalita-  
te, Nazianzenus de plaga grandinis, alij de  
bello. A. Quid? argumenta & probationes,  
vnde sumentur? S. Tace Schonæ: audies  
suo loco facilius; nam hæc ad contentionē pro-  
priè spectant, de qua, ne idem sæpius repetatur,  
paulò pōst. nam & magnis id contigisse, ipse vi-  
des, vt eadem sæpius in hac parte repeterent. Ne-  
que enim hoc loco illud *anglès* Geometricum



confectari volumus, sed ne possumus quidem, etsi vellemus; sed nec alij valdè potuerunt. A. Quoniam igitur de materia dixisti, dic de motu. S. Motus in quibus Christianus Orator elaborabit, illi erunt, charitatis, spei, gaudij, cælestium rerum cupiditatis, exstasis cuiusdam diuinæ, suiq; quodammodo obliuionis, misericordiæ, poenitentia, rerum nouissimarum metus, & desiderij; odij in malum, zeli pro domo Domini, sui ipsius, ac rerum humanarum contemptus; vt discat auditor, contemnere mundum, contemnere nullum, contemnere sese, contemnere se contemni. Nam iocus & risus, aliique humani affectus, hîc locum non habent, nisi si quando ex commiseratione ducantur, & in traductionem & contemptum viti-  
orum hæresumque fiant: curas hominum, spes vanas, magnum in rebus inane rideant: & mundi fallacias, artes, insidias aperiant: hominum peruersitatem, duplicitatē, hypocrisim, vanitatemque detegant. Quod Chrysostomus, Basilius, & alii sæpius faciunt; Basilius autem in illis orationibus maximè, quas de auaritia, vsura, ebrietate item diuinitus conscripsit. A. Vade hos affectus colligis? S. Ex Christi, prophetarum, Pauli, aliorumque sanctorum doctrina; vobis enim philosophis



sophis hæc minus placere solent. A. Quomodo autem hos motus excitabit atque accendet? S. Charitatis quidem, ipse diligendo: spei, ipse sperando ac desiderando: poenitentia, si ipse contritus fuerit. Quod idem de aliis sentiendum est; ut non modò incendere auditorem, sed ipse etiam ardere videatur. Neque enim aut titio extinctus, accendere potest, aut fax ardens non inflammare. Iuuabit tamen plurimum, si Prophetas, psalmos, sanctosque patres diligenter legat; & ex quibus capitibus moueant, notet, hoc est, materiam, motus, rationem, & modum. Quinimo, ubi ipse frigebit, neque eorum grauitatem imitando consequi poterit, ( quod plerunque fit ) ipsos & ad se, & ad alios, accendendos patronos aduocet, illorumque perfectas & integras sententias adhibeat: neque prius vel orando, vel clamando, vel ipse plorando defatigetur, quàm vberem lacrymā excusserit. In quo, mirum est, quantum excellabat LVCAS ille noster Dominicanus, vir quondam in dicendo magnus. Hoc idem planè efficiet, si Concionatores spiritu ardentibus ipse audierit: ac spirituales quosdam libellos, in quibus semina & scintillæ pietatis continentur, legerit; D. inquam Ephrem, Basilii, Augustini, Bernardi, Bedæ, An-



selmi, Bonauenturæ, Carthusiani, Gersonis, Grana-  
tense, & si qui sunt in hoc genere alij. A. Quid  
tum postea? S. Nihil. A. Videris mihi similis  
magister illi, qui, cum ad cœnam quosdam vo-  
casset, ac præclare mensam adornasset, multa-  
de arte accipiendi hospites differuisset, ipse ap-  
posuit nihil. Sic tu nos ad Psalmos, Prophetas, &  
Patres remittis: hoc est ad forum & macellum  
hospites ablegare, vbi ipse ad cœnam eos voca-  
ris. S. Est ita vt dicis. Nam & Grammatici  
loqui docent; verba tamen aliunde quærenda  
sunt. Et Arithmetici numeros tradunt; pecuni-  
am tamen, quam numeramus, non præstant; ipsi  
inopes plerunque. Mensuram præbet Geome-  
tres; ipse pedem vbi figat, aliquando non habes.  
Modum docemus, res non largimur, studio pri-  
uato opus est, animaduersione, & obseruatione  
multa. Firmius tenentur, & cum maiori energia  
efficaciusque exprimuntur, quæ quisque ipse ob-  
seruauit. Nam & vestri in hoc genere (vt verè fa-  
tear) ridiculi mihi visi sunt; dum aut irasci, aut  
lætari, aut inuidere docent. Quasi verò ista non  
natura potius, quàm aliqua arte constent. Sed  
hoc fit aliquid. A. Videmus quid agas: fon-  
tes digito commonstras.

Quo-



Quoniã igitur de materia & motu dixisti, ad ordinẽ te referas; & quid quoq. loco tuus Concionator dicturus sit, doce. S. Priùsq. de ordine dicimus, cõmonendus est quarundã rerum, sine quibus rectũ ordinem conseruabit nunquã. Primum, ne se varietate & multitudine argumentorũ obruat. Errant enim illi, qui se tũ copiosos putãt, si de omnibus rebus vno loco dixerint. Copiosus verẽ ille erit, qui de re proposita, & ad eundem finem, ita vt fidem faciat, aptè & sufficienter dicere poterit. Secundò, ne omnia, quæ aut scit, aut legat, etiam de eodem argumento, dicat. Multa enim possunt esse, aut infirma, aut ambigua, aut incerta, aut aliqua circumstantia inquinata. Ne illud Fabij ipsi eueniat; vt dum nihil perdere vult, perdat omnia. Cortices relinquat, nucleos proponat quantum fieri potest: ac optima quæque semper, ad præsensque negotium accommodatissima, seligat: vulgò audita & cognita relinquat, neque id curet vt multa, sed vt multũ dicat. Sed & ea, quæ seriò ad probandum sumuntur, præter ea, quæ primò & per se probant, eò amplius aliquid cruditum, iucundum, inopinatũ, quasi ex latere habeant, quod auditorem & delectet, & instruât; quod SCARGA noster præclare facit



facit. Tertiò, vt non magis cogitet quid dicat, quàm quid non dicat: nam sæpè illa, quæ non dicenda erant, euertunt & inquinant, quæ præclarè dicta sunt: ac vt desiderium suæ orationis, quod medici in cibo præcipiunt, semper relinquat. Quartò, si graues materias, maturè expedire velit, citò & statim à principio eas proponat, tanquam optimos & saluberrimos cibos, neque more rusticorum ad extremum orationis differat. Postea enim in Parergis & superfluis, consumpto tempore, necessariis non relinquetur locus: fessòq. auditore exhaustis viribus, titubando, molestus omnibus, illas peraget: ac ne quicquam cleplydras, ac hominum assurrectiones, motus, & tædia aspiciet, seque ita confundet. Nam & Diogenes interrogatus, cur prior semper in Olympia pedes veniret, quàm alii equestres; respondisse fertur, se priùs domo egredi solere. Nam quod citò perficere volumus, citò ac statim illud aggrediamur oportet. Et proinde, ne exordiis quidem longis (vt ad rem propiùs accedamus) opus habebit: si tamen illis aliquando vtetur, vniuersa ad docilitatem & intelligentiam cōparabuntur, honestumq. causæ accessum præparabunt. Nam beneuolentiam captare, quid opus est apud eos, qui



qui spontè ad audiendum parati sunt; nisi fortè in persona sit aliquid vitij; aut superiùs aliquid ambiguè, & suspectè dixerit. Sed commodissimū erit, cautè & prudenter orationem instituere, personæque suæ obliuisci; neque enim ille est, qui loquitur: sermones hominum non curare; & si quid huiusmodi fuerit, domi & apud se corrigere. A. Vnde ergo ordietur? S. Ordietur, vel ex totius argumenti partitione, causæq. informatione: vel continuabit sequentem sermonem, cum superiorum temporum doctrina; quod ut ad docilitatem est maximè accommodatum, ita quandam habet venustatem: vel si quid prætermisum, aut secus commissum sit in priori concione, complebit, & interpretabitur: vel ea, quæ illum impedire videntur, auferet. Habent & illa non parum dignitatis & venustatis, si ordiamur à graui aliqua prophetia, vel à figura veteris legis, præsentī negotio accommodata, vel à communi verbo siue prouerbio, dicendique modo, vel à subita quadam circumstantia, insperatoq. euentu.

A. Vbi exorsus fuerit, quid faciet? S. In ciuilibus quidem causis narrari solet; apud nos nō ita frequenter: fit tamen aliquando. Illud autem narrationis genus, crebriùs adhibetur, quod per

C

omnes



omnes partes orationis fufum eſt. In quibus ſer-  
uabit illa communia veſtra (nam nihil hîc propri-  
um video) nempè vt vera narret & conſentanea,  
certis & receptis authoribus eadem fulciat: co-  
gnita non inculcet: non omnia explicet: multa  
attingat ſolùm: neque altè cauſam ordiatur: in-  
primis autem obſcuritatem, quæ narrationē ma-  
ximè ſequi ſolet, fugiat. Quod ita conſequetur,  
ſi temporum, locorum, perſonarum, & alias cir-  
cumſtantias obſeruabit.

A. Quid deinceps ſequitur? S. Contentio,  
in qua cardo negotij verſatur, totaq. ratio perſua-  
dendi poſita eſt. Conſtat hæc cōfirmatione & re-  
futatione, vt ſcis. Optat alicubi Hieronymus, vt  
Lactantius ita potuiſſet noſtra confirmare, quem-  
admodū aliena refutauit. Nam neq. ille, qui ſua  
confirmare non poteſt, aliena rectè & ſolide refu-  
tare poterit; & alienis non refutatis, noſtra ſtabi-  
lire difficile eſt. Conſtat hoc vtrunq. argumen-  
tis. Argumenta ex locis petuntur. Loci autem,  
aut inſiti ſunt, aut aſſumti. Inſiti, in re ipſa hæ-  
rent, & diſcurſu rationeque colliguntur. Aſ-  
ſumti, testimoniis, & authoritate conſtant. Pri-  
us genus locorum, Dialecticorum, aut Philoſo-  
phorum eſt; indeque ſcientes, & dogmatici vo-  
cantur.

*Stan: Socolouii.*

19

cantur. Posterius hoc, nostrum, hoc est, Christianorum est peculiare: indeque fideles, quod auctoritatem & testimonia sequamur, vocari solemus, hi que nobis pro insitis habentur. Vnde illud Isaia: Nisi credideritis, non intelligetis. Et illud Habacuc: Iustus autem in fide sua viuet: id est *Haba. 2.* non sensu & ratione, sed fide nitetur. Et tota illa series Patrum, quam Paulus recensuit ad Corinthios, hac eadem fide subnixa, sua omnia sciebat, & vixit, Quod ipse Paulus fusiùs interpretatur: *Ar- 2. Cor. 10* ma militiæ nostræ non carnalia sunt, sed potentia Deo, ad destructionem munitionum, consilia destruentes, & omnem altitudinem extollentem se aduersus scientiam Dei, & in captiuitatem redigentes omnem intellectum, in obsequium Christi, & in promptu habentes vlisci omnem inobedientiam; cum impleta fuerit vestra obedientia. Accersuntur tamen & illi aliquando. Assumpti loci doctrinæ Christianæ, illi numerantur à doctis.

Primus est, ex reuelatione aliqua diuina non scripta, vt indicat D. Paulus: Prophetæ duo aut *1. Cor. 15.* tres dicant, & cæteri diiudicent: quod si alij reuelatum fuerit sedenti, prior taceat. Argumenta autem ex hoc primo loco, non habent vim faciendi fidem Catholicam, nisi reuelationes autho-



ritate Ecclesiæ confirmatæ sint, quod ex verbis S. Pauli constat, cum reuelationes in coetu diiudicandas esse docet. Nam alioquin, & maximè hoc seculo, periculosus est hic locus, fundamentum planè Anabaptistarum & Svenckfeldij.

2. *Tim.* 3. Secundus ordine locus, fide vero primus est, è scripturâ sacra. Omnis, inquit Paulus, scriptura diuinitus inspirata, utilis est ad docendum, arguendum, corripiendum, & erudiendû. Scriptura autè sacra duplicè potissimùm sensum habet, mysticû, & historicû, quem passim literalem vocant. Mysticus quidem valet ad docendum, ad corripiendum, ad erudiendum; sed ad arguendû, id est, ad fidem faciendâ, non ita est accommodatus; potest enim esse multiplex & varius, quod Dionysius Areopagita, in epistola ad Polycarpum, Hieronymus in Matthæum, docuerunt. D. Augustinus quidem, contra Donatum, multû ridet illos, qui ex illis verbis Cant. 5. Indica mihi vbi pascas, vbi cubes in meridie: probare voluerunt Ecclesiam Catholicam tantùm esse in Aphrica, quòd sit pars meridionalis. Quod tamen ita intelligendum est, si sensus mysticus non alio loco scripturæ expositus & comprobatus sit. Nam alioqui rectè concludit: Vt quod dictum erat sensu historico de Salo-

Salomone: Erit mihi in filium, & ego ero ei in <sup>2. cap. 7.</sup> patrem, Paulus exponit de Christo. Et quod dictum erat de cælis: Cæli enarrant gloriam Dei; <sup>Psal. 18.</sup> idē Paulus vsurpat de Apostolis. Ex historico autē <sup>Cap. 10.</sup> sensu, certum & firmum sumitur argumentum; eadem tamē ratione; si Ecclesiæ autoritas & interpretatio accesserit. Nam fieri potest, vt aliquis sit sensus historicus cuiuspiā loci; tamen, quia nondū est ab Ecclesia confirmatus, ex eo duci non potest argumentū tale, cui penitus inhærendū sit; vt cum D. Paulus se vsq. ad tertiū cælum raptū fuisse dicit; pleriq. hoc verum & quod oculis cernimus cælum interpretantur, nec nos pugnamus: hic tamen sensus talis nō est, qui fidē constituat Catholicam; cū nihil hac de re ab Ecclesia definitū sit. Quapropter summa rei est, nullū verū argumentum ē scriptura, quæ vel maximè perspicua videatur, erui posse, quod fidem Catholicam generet; nisi accedat autoritas & interpretatio Ecclesiæ Catholicæ. Hoc significatum est exemplo illo Iacobi & Esau. Isaac, alioquin magnus Patriarcha, non potuit discernere inter vocem Iacob, & pellem Esau: Rebecca, quæ ferebat formam & speciem Ecclesiæ, vtpotē cui mysterium hoc reuelatū fuerat: duos populos esse in vtero eius, & ma-



iorem seruiturum minori, probè intellexit, quis  
esset verus Iacob, aut verus Esau. Huc eodem  
pertinent figuræ veteris legis, & parabolæ nouæ.  
In figuris veteris legis diligenter videndum erit,  
in quo propriè consistat figura, & ad quid refe-  
ratur. Quam, si alia scriptura interpretabitur, vt  
superiùs diximus, aut similem aliquam illi figuræ,  
quomodo petram illam deserti Paulus exponit;  
idem valebit ac sensus historicus. Eodem modo  
antiqui patres probârunt ex veteris testamenti fi-  
guris, Christum verum Mesiã esse; quia Paulus,  
& alii Apostoli eas ipsas figuras hoc modo expo-  
suerunt. In parabolis autem noui testamēti, præ-  
ceptum Chrysostomi obseruandum est: In omni  
parabola semper aliquid esse præcipuū, quod di-  
catur ad probandū id, de quo agitur; multa dein-  
de ad explendū sensum, & ornandam orationē,  
dici; igitur cauendū esse, ne ex illis rebus, quæ in  
parabolis explendæ narrationis causa dicuntur,  
argumenta sumamus. Nam alioquin & furari &  
foenerari ex parabolis licitum esse colligeretur; vt  
de Villico, & de talentis traditis. Clauis autem  
assequendi sensus, & aperiendæ parabolæ, hæc  
erit. Primū occasio, vnde nata sit parabola, vi-  
denda est: deinde similis parabolæ in alio loco  
inter-

interpretatio: denique, quod summum est, vltima  
sententia, & quasi Epimythion, hoc est, scopus &  
sensus parabolæ, quo cōcludi solet; quale est illud  
de veste nuptiali: Multi vocati, pauci electi. Et *Matt. 22*  
illud, de primo accubitu: Qui se exaltat, humili- *Lucæ 14.*  
abitur. De virginibus item: Vigilate, quia nesci- *Matt. 2*  
tis diem, neque horam. Dabit autem operam, ne  
ad confirmandum, scripturas aut alienas, & mul-  
tū remotas, aut ambiguas, aut in contrario sen-  
su prolatas, afferat. Hæc enim aliquando vero ac  
legitimo sensui apud vulgus multum detrahere  
solent, ac hominibus vti sūtis latus Doctoris ape-  
rire, eumq. ridendum propinare. Plūsq. interdum  
vnus debitè locus allegatus valet, quàm sexcenti  
extra propositum inuecti. Itaque & eam ostenta-  
tionē fugiet, quæ & molesta est, & nihil prodest.

Tertius est locus, ex traditione, quæ eandē vim  
penitus habet ad fidem Christianam faciendā, quā  
scriptura. Sic enim Paulus hæc coniungit: Tene- *2. Tes. 2.*  
te, inquit, traditiones, quas didicistis, siue per ser-  
monem, siue per epistolam nostram, siue per scri-  
pturam. Non enim minus verbum Dei est, quod  
voce traditur, quàm quod scriptura. Ex eo enim  
tota res pendet: nō quòd dictū aut scriptū sit ali-  
quid; sed quòd à Deo profectū. Et quæ Apostoli  
dice-



dicebant, antequam scripto mandarentur, Dei verba erant; indeq. communi vocabulo scripturæ, etiam ipsa traditio vocatur; & D. Paulus, su-

1. Cor. II. um Euangelium traditionem vocat: Ego accepi à Domino, quod tradidi vobis. Quinimò in hoc, traditio superat scripturam, quòd tempore prior sit, quòd clarior, quòd latiùs pateat, nec corrumpi & interire, aut in varios sensus ita facilè tor-

2. et 3. Ioã queri possit. Itaque D. Ioannes se chartæ atque atramento multa credere nolle dixit. Dum autem de traditione loquimur, eam quæ Catholica sit, quæ & scripturæ & rectæ rationi conueniat, & quam Ecclesia approbavit, cum D. Augustino intelligo. De qua plura alibi diximus.

Lib. I. de  
Ecclef.

cap. 3.

Quartus locus, est ab authoritate Conciliorum generalium, ex quo sumpta argumenta, eiusdem fidei & authoritatis sunt, cum superioribus. Sic filium Dei  $\delta\mu\acute{o}\nu\sigma\tau\omicron\nu$  patri credimus, quia ita prima Nicœna Synodus definiuit; etiam si hoc nomen in sacra scriptura non inueniatur. Sic Spiritum sanctum, patri, & filio  $\delta\mu\acute{o}\nu\sigma\tau\omicron\nu$  & ab utroque procedere; quia Constantinopolitana & Romana Synodi, eodem tempore, ex scripturis ita sanxerunt. Idq. eas ob causas; partim, quòd Concilia Ecclesiæ Catholicam representant, quæ errare non potest; est

est enim columna ac firmamentum veritatis : partim, quòd præsentem Spiritum sanctum habeant; sic enim in primo illo Concilio Apostolico: Visum est nobis, inquiunt, & Spiritui sancto; ac si Spiritus sanctus illius Concilij Dux & præses fuisset, ut quidem fuit: partim, quòd promissionem illam Christi acceperint: Vbi sunt duo vel tres congregati in nomine meo, ibi sum in medio eorum. Hæc autem, quæ dicimus, de iis Conciliis intelligimus, quæ legitimè congregata sunt; & ex illis personis, ex quibus ritè congregari debent; & ab iis, quibus hoc munus incumbit, ut congregent, & præsideant, quæque κεφαλα non sunt. Nam alioqui conciliabula & conuenticula potius, quàm Concilia erunt dicenda; quale Ariminen. fuit; & nunc passim hæreticorum omnia sunt, & fuerunt semper. Habita est tamen, & Synodis provincialibus legitimè congregatis, & superiorum autoritate confirmatis, semper sua fides & autoritas.

Quintus locus est, fide & autoritate proximis, à Decretis Pontificum: habet autem vim ex illis capitibus. Primò, quòd ab antiquis diebus, inquit Petrus, voluit Deus per os illorum audire gentes verbum Evangelij, & credere. Deinde, ex illa celebri commissione muneris: Pasce oves meas, pa-

D

sce



sce agnos meos ; pascuis certè verbi & doctrinæ.

*Lucæ 22.* Tertiò, ex oratione Christi Dñi: Ego pro te oraui Petre, vt non deficiat fides tua : & tu aliquando conuersus, confirma fratres tuos. Quæ tamen de illis decretis intelligenda erunt, quæ de rebus ad fidem pertinentibus, & ex officio munereq. proprio fiunt: nam in aliis multa, pro locis ac temporibus, aliisque circumstantiis, sæpè mutantur.

Sextus locus est, ex consensu Patrum, non dissimilis, meo iudicio, valoris: partim, quòd ii, vt plurimum Episcopi suarum Ecclesiarum fuerint, in locumque Apostolorum ac discipulorum Christi, successerint; iuxta illud: Pro patribus nati sunt tibi filij: partim, propter vitæ sanctitatem, cælestibus signis ac miraculis comprobata: partim, quòd multi ex his præsentis Christi discipulos viderint; eorumque auditores, aut saltem discipulorum discipuli fuerint; ac plerisque earum rerum, quas nunc credimus, ipsi interfuerint, manibusq. suis attrectauerint: partim, propter Ecclesiæ veteris, quam illi recens plantatam irrigabant, necessitatem: tum, quòd tacito omnium Conciliorum & orbis consensu, eorum doctrina confirmata sit: tum, quòd à nostris seculis remoti, ab omni affectu & perturbatione

libe-

liberi fuerint, quod testium & iudicum debet esse proprium; utpote ad quos tempora & controuersia nostra non pertinebant. Mitto solidam eruditionem, linguarum cognitionem matrem: mitto pertinacem studium & diligentiam, quibus omnia cedere solent: continentiam item & abstinenciam, cum quibus effoeta haec nostra aetas comparari non potest. Hoc autem, quod dico, intelligimus de vniuersali patrum consensu; qui suorum temporum, meo iudicio, Ecclesiam representant; ubi praesertim aliquid affirmant, non opinantur; ubi sua astruunt, non extremas haereticorum sententias persequuntur: nam tum aliquando in contrariam partem eorum sententiae propendere, studio refutandi, videri possunt.

Septimus, sumitur ex autoritate vtriusque scholae, nostrae inquam, & eorum qui Canonica iura interpretantur: quae, ut Cathedrae populari minus feruit; ita ad fidem Catholicam faciendam, propter recentem temporum rationem, non ita ut superiores, valet. Tenenda tamen est; sed ut opiniones & disputationes teneas, usum populo dones. Nam & pictor imagines praebet populo, penicillos & lecythos domi sibi relinquit. Nihil enim magis vitiosum est, quam instrumenta & praesidia artis, quod ne coci quidem faciunt, ostendunt.



tare. Utatur magistris ipsis domi:foris doctrinam Christi doceat. Vellem autem ultra D. Thomam non multum progrediatur, nisi consilij capiendi causa: non quòd alios contemnendos censeam; sed quòd tantum temporis non supersit, vt omnes legere possit; & veterum patrum magna sit copia, quibus legendis ætas vix sufficit humana.

Habent & Rabinorum libri Cabalistarumque, suum aliquem locum, præsertim, si cum Iudæis certamen ingrediendum est, quod sæpè fit; vel cum his hæreticis, qui nunc noui Iudaïfantes vocantur; vel apud dubios, & vacillantes Christianos. Eorum autem maximè, qui antè Christi aduentum fuerunt, aut paulò post, qualis Ionatas, Rabenu Hacados, (quem propter authoritatem, magistrum nostrum sanctum, Hebræi veteres vocant) Philo Iudæus, & Iosephus, & alij quidam. Non solum istis autem vtetur, sed quandoque etiam ad Philosophos eorumque rationes, & testimonia se conferet: historias item. Id autem potissimum istis in locis. Primùm, si cum infidelibus disputabit, apud quos sacra scriptura locum non habet; idque vel eorum argumenta longè firmioribus refutando, vel nostra confirmando. Itaque Lactantius illud non laudat in Cypriano,

no, quòd disputans contra Demetrium Philosophum, diuinarum scripturarum testimoniis vsus sit. Deinde ea, quæ sacris scripturis probari non possunt, ad sacram tamen doctrinam pertinent explicando; vt de cælo, de spiritibus, de virtutibus, & vitiis; de formis ac speciebus rerumpub. de bello, & pace. Vltimò, curiosorum hominum, atque inconstantium animos confirmando, quod D. Paulus quandoque facit; vt de resurrectione, <sup>1. Cor. 15.</sup> vitaque futura. Quidquid enim vsipiam verum est, hoc nostrum esse, dicere solebat Augustinus. Sed <sup>1. Reg. 17.</sup> & Daud, extorsit de manibus Gigantis proprium gladiũ, quo illum iugulauit. Et Samson mandibula asini, nõ propriis & vsitatis armis, confecit mille Philistæos. In Deuteronomio item iubetur, <sup>Deut. 21</sup> vt si quis velit ducere vxorem alienigenam, prius tondeat illius caput, & præcidat vngues. Quod D. Hieronymus de prophanis studiis, ad fidei obedientiam reuocandis, eorumque superfluis refecandis intelligit. Sic Iosue Gabaonitis condonauit vitam, ea ratione; vt inseruirent Iudæis, cedendis lignis, & comportanda aqua. Verum, hæc <sup>Iosue 9.</sup> Basilius in eo libro, quem scripsit de vtilitate, ex gentiliũ libris petenda vberius. Ita autẽ in his versabitur; vt semper recordetur, in aliena se pos-



sessione versari. Quod ita efficiet, si nihil prius & antiquius habebit, illis ipsis prioribus capitibus fidei nostræ, de quibus dictum est: & si cum aliquantis in his substiterit, pedem statim tanquam ex quodam itineris diuersorio referet, ne videamur multum Aegyptiis opibus indigere. Et de locis quidem, nostræ facultatis propriis, satis.

A. Quid de cōmunibus locis, qui vulgò insiti vocantur? habesné aliquid quod doceas; vt à definitione, partium enumeratione, notatione verbi; item ex genere, ex forma, ex similitudine, ex differentia, ex contrario, ex coniunctis, ex antecedentibus? S. Non contemnendos puto: imò diligenter cognoscendos, illisque vtendum: quos qui cognoscere velit, eum ad vestros remitto. Neque enim frustra hæ vestræ artes communes dicuntur; inseruiunt enim omnibus, qui illis vti velint. A. Estné aliquid peculiare, quod ad nostræ artis vsum, ex parte eorum locorum dici possit? S. Nihil admodum. Eadem enim est ferè ratio in omnibus: si quid tamen est, docuit hoc præclare in suis Theologicis Topicis, vir acutus & disertus, & ad elegantiorē Logicā planè natus, Ioachimus Perionius Gallus, qui faciliè & legi, & comparari potest.

A. Quid

A. Quid de argumentorum ordine? in hoc enim loco versamur. S. Illud comunne, verissimum tamen, vt maximè firma in fronte collocet; debiliora & mediocria in mediam turbam atque gregem coniiciat; fortissimis ac robustissimis, totam cōcludat aciem. Hæc enim, quia vltima sunt, maximè inhærent animis: prima, primò influunt, & animos audientiū occupant: leuia autem planè dimittat; eleuant enim causam, & bonis argumentis fidem detrahunt. Reliqua, quæ artis sunt, ex arte à vestris petes; vt quidem tu fortè melius nosti hæc; nos enim hæc iam olim, vt vides, de manibus dimissimus. Et contentionis quidem summa hæc erit. Pugnabit autem, qui lateribus suis confidet. Nam si quis minùs se in hoc genere potentem videbit; in vita potiùs ac moribus instruendis sanctè versabitur. Causam enim magnam malè agere, prodere est.

A. Contentionem, quid sequitur? S. Peroratio. Summam totius contentionis hæc complectitur breuiter, idq. obiter potiùs, & per figuram aliquam, quàm ex instituto vniuersam causam repetendo. Amplificationē item & motum. Neq. quemuis motum, sed eum, ad quem totum negotium à principio comparatum est. Reprehensio-



hensionem item morum & vitiorum ; maximè enim ea mouent, quæ vltimo loco dicuntur. Nihil autè magis fugiendum erit in hoc loco, quàm ne vbi perorauerimus, aliud nouum quoddam argumentum, cùm magno auditorum fastidio instituire videamur ; neuè aliquid ineptum dicamus. Sæpè enim optimam causam, insulsa & inepta peroratio inquinat, ac euertit.

A. Quoniam autem quid dicat, & quo loco dicat, dictū est : quomodo tandem dicet ? S. Rem difficilem quæris : & de qua, ne inter illos quidē vestros, qui hoc solū in vita egerunt, conuenit. Nosti illam inter Brutum & Ciceronem, de optimo genere dicendi, contentionem ? Caput autem huius rei in eloquendo, & agendo consistit ; quæ vtraque vobis magistris, qui hæc magnificè in scholis iactare soletis, ne vobis denuò auditores auocemus, plenius explicanda relinquimus. Nobis satis erit nostrum sensum, de hac re, paucis aperire ; quibusdam, quæ ab eo negotio non multum remota sunt, prius in medium allatis. Primum, si aliqua præstanti eloquentia præditus fuerit is ipse tuus Concionator, ne eam dissimulet, sed aptè & decorè ad laudem Dei vtatur : si exili ; ne summā affectet. Nam neq. D. Chrysostomus,  
aure-

auream suam eloquentiam dissimulauit: neque D. Thomas Chrysostomi affectauit. Dabit Dominus Deus utrique profectum, modò vana non quærat gloria. Secundò, cùm arte hac vestra dicendi non se venditet, ac ne cum cæteris quidem. Nam si in ciuili oratione hæc multùm obfunt, fidemque orationi detrahunt; quantò magis in cælesti doctrina? Qui enim vult ne sibi infantia obiiciatur, disertus videri nolit: Et proinde ornamenta, quæ nimis comptam reddunt orationem, respuet: simplicitatem, & verecundiam, amabit: concinnitatem nimiam, inuidiosumque numerum, non consecrabitur; simplicitas enim veritatis pedissequa est, eiusque comes modestia: omnis autem affectatio, & fucus, suspectus est, iis præsertim in causis, quæ omnem fucum & vanitatem conculcant. Itaque ineptias illorum mirari non possum, qui ea, quæ omnibus modis deberent occultare, iactant, ac proferunt; omnemque eruditionis opinionem se perdituros existimant, nisi quid crudi & indigesti aliundè afferant. Tertiò, dabit diligentem operam, ut è tenebris materias educat; non in eas inducat. Hoc autem efficiet, si non cupressum vbique simulabit, & proximam seruabit regulam. Nempè, ut voces secundæ im-

E

sitionis,



sitionis, & id genus alias, tanquam populo igno-  
 tas, fugiat: sua lingua vtatur; vel ea, qua illum vri  
 necesse est, & quam optimè nouit, aliasq. non  
 iminisceat. Vltimò, ne pro virtutibus aliorum  
 vitia imitetur; neue exprimere velit, ad quæ na-  
 tura minus aptus est, quod ne Comici quidem fa-  
 ciunt. Quibus conseruatis, oratorum supellectili  
 parcè, & verecundè vtetur; simplicitate, veritate,  
 & grauitate contentus: genus dicendi adhibebit  
 sanum, castum, seuerum, perspicuum, verecundū,  
 modestum, moratum, à sermone familiari non re-  
 motum; ex sacris Euangelis, D. Pauli, & aliorum  
 sanctorum doctrina, sacris Canonibus, sanctisq.  
 Patribus contextū: quale quondam mirabamur  
 in hoc ipso MELCHIORE Dominicano, non magis  
 voce, quā vita & moribus, Concionatore, qui to-  
 tam illā orationem acumine quodam condiebat.  
 Protulerat hoc in genere itidem non paucos, nec  
 multum inter se dissimiles, hæc nostra, magnorū  
 virorum foecunda mater, CRACOVIENSIS schola;  
 meo iudicio, huic Septentrioni valdè vtilis, &  
 necessaria, quos quidē mihi illo tempore audire  
 contigerat. Grauis & simplex fuit oratio AQUILI-  
 NI: dulcis & concinna BENEDICTI: casta & vere-  
 cunda OBREMBII: sagax, & acuta LEOPOLIENSIS:  
 bene

benè & liberè docebat, hic, qui nunc Scholæ vestræ præest PILSNENSIS. Adhibebit item omnis generis Tropos, modo aptè & concinnè, quibus sacra doctrina mirè delectatur. Figuras verborum nō multum curabit: quicquid enim nimis tersum, & expoliturum est, ab hoc genere alienum esse debet: sententiarum, pro loco & tempore, ubi se offerent, non omittet; neque tam à Demosthene, Platone, Cicerone, quàm à Dauide, Isaiâ, Salomone, & aliis prophetis eas mutuabitur. Illas præsertim, comparisonis, similitudinis, oppositionis, libertatis dicendi, quam Græci *ωαρερίαι* vocant; magis autem illas Pauli, ut arguat, obiuret, increpet, obsecret, instet opportunè, importunè, polliceatur, comminetur, terreat, mulceat, consoletur. Quorum ornamentorū plenæ sunt prophetiæ, ut diximus, plena Pauli scripta, de quibus posset esse separatus dicendi locus. Verùm obseruabit quispiam ex vobis hæc; nam nostra valetudo qualis sit, ipse vides. Maiora, crede mihi, sunt hæc apud nostros, quàm apud eos, quos vestri admirantur, quantū legisse utroque licitum est. nam neq. numine carent cælesti, & vetustiora sunt, & in magnis argumentis versantur. Sed ea, huius seculi impietas depreßit,



quæ illi Athanasii, Basilii, Nazianzeni, homines ipsi admirabiles mirabantur. A. Hoc illud est: dissimulas quædam. Obiurgare iubes: eius rei modum tradis nullum. Atqui hoc est difficile; offendit multos maiores præsertim. S. Non dissimulo, id difficile esse; sed hoc curæ nobis esse non debet. Si enim placere hominibus velit, Christi seruus non erit: Qui hominibus placere voluerunt, confusi sunt, inquit Psalmus, quoniam Dominus spreuit eos. Poterit tamen & hic, quod ad hominem contagione infectum, medici ingressuri facere solent, aliquam medelam, seu cautionem quam Græci προφυλακτικὴν vocant, adhibere. Si obiurgabit; non malitiosè, non ex odio, non vindictæ causa, non in gratiam alterius, non ad vulgi opinionem id faciat: ea quæ scit, non quæ ab aliis accepit, reprehendat: obiurgationem inter omnes distribuatur; zelo & amore illorum, quos accusat, commoueatur; vitia potius quam homines infectetur; ut illud cum D. Paulo dicere

2. Cor. II. possit: Quis infirmatur; & ego non infirmor? quis scandalizatur; & ego non vror? in quo genere illud præcipue seruet, ne culicem colat, & camelum deglutiatur; & ut præsentibus (quod ingenui est) potius, quam absentes obiurget. A. De actione, quid censes? S. Ut sit modesta & orationis

onis cursui accomodata; & non modò non histrionica, & scenæ; sed etiam hac Oratoria paulò quietior, & moderatior: modica iactatione corporis; multa oculis & vultu conficiens, neque tamen mortua & exanguis. Ita vt non præsumat, ac si in popina loquatur: neq. desperet, tanquam nõ apud homines, eiusdem infirmitatis, cuius ipse sit, verba faciat; quod in omni rectè suscepto negotio videndum; sed ita statuatur, se apud eos, qui sunt eiusdem conditionis, loqui, iudice tamen & inspectore Deo. de quo agendi genere, nemo melius & breuius tuo Arpinate. Status in Oratore, inquit, erectus & cellus: rarus incessus, nec ita longus: excursio moderata, eaq. rara: nulla mollicia ceruicum: nullæ argutiæ digitorum: non ad numerum articulus cadens: trunco magis toto se ipse moderans; & virili laterum flexione, brachii projectione in contentionibus, contractione in remissis. Vultus verò, qui secundum vocem plurimùm potest, quantam affert tum dignitatem, tum venustatem? In quo cùm effeceris, ne quid ineptum aut vultuosum sit, tum oculorum est magna quædam moderatio. Nam vt imago est animi vultus; sic indices oculi: quorum & hilaritatis, & vicissim tristitiæ modum, res ipse de quibus agitur,



tur, temperabunt. A. Quid? memoriæ, quod minimè oportuit, oblitus mihi videris? S. Ludiſ? Theſaurus hæc eſt & cuſtos eorum omnium, de quibus diximus; ſine qua omnia cætera, etiamſi præſtantiffima fuerint, in eo qui dicit, peritura intelligimus. Hæc à Deo, & à naturæ bonitate, datur: ſtudio & diligentia augetur: uſu, & exercitatione perficitur: vita continenti, rectaq. victus ratione conſervatur. Rem benè præuiſam, probè intellectam, multùm diuq. cogitam, ac debito diſpoſitam ordine, facilè condit, ac ubi opus eſt, promit. Nam reuera, quod planè prætermiſeram, tum demum rectè & maturè orator dicet; cùm non ex tempore ficta, ſed multũ & diu cogitata, de quo Cato apud Ciceronem gloriatur, domo attulerit. Cætera de memoria, quæ à veſtris traduntur, ſubtiliora magis, quàm certiora videntur, quæ tamen non reprehendo. Et hæc quidem ex aliqua obſervatione, optimorumq. per multos annos, Concionatorum, tam domi, quàm in urbe, diligenti auſcultatione, uſu denique aliquanto noſtro, hæcenus.

SIMON SIMONIDES  
LEOPOLIEN.

**P**ostquam molesti pertinax morbi labor,  
Sermonum honorem, & oris abstulit decus,  
Diuū disertō interpreti Socolouio,  
Nec iam vigorem posset vsque pristinum  
Tenere fandi; ad astra quo Regum inclytas  
Mentes vocabat: ne illa maiestas sacra  
Linguae efficacis prorsus exolesceret;  
Qualis vigebar tum, hanc sua ipsemet manu,  
Hoc in libello, imaginem expressit sui;  
Ut alii haberent, vnde sese fingerent.  
Tamen, perite lector, haud putaueris,  
Hac in pagella perbreui, vna atque altera,  
Quantus fuerit, omnem editum Socolouium:  
Duntaxat haec imago, vel adumbratio,  
Est potiùs exigua; pari exemplo solet  
Parua in tabella, pictor expressam dare  
Latè patentis orbis, aptam imaginem.

LAVS CHRISTO DOMINO.



HELIOTE UNIT



1000 L. 1000













